

## PRIJEDLOG

Na osnovu člana III stav 1. tačka i) i člana IV. stav 4. tačka a) Ustava Bosne i Hercegovine, Parlamentarna skupština Bosne i Hercegovine, na \_\_\_ sjednici Predstavničkog doma održanoj \_\_\_\_\_ 2008. godine i \_\_\_ sjednici Doma naroda održanoj \_\_\_\_\_ 2008. godine, usvojila je:

### ZAKON O KONTROLI KRETANJA ORUŽJA I VOJNE OPREME

#### I – Opće odredbe

##### Član 1.

###### *(Predmet zakona)*

Ovim zakonom uređuje se način i uslovi pod kojim se obavlja kretanje oružja i vojne opreme (u daljnjem tekstu naoružanje) unutar Bosne i Hercegovine, organi nadležni za izdavanje odobrenja za kretanje naoružanja, podnošenje zahtjeva, sadržaj odobrenja, nadzor i kontrola nad kretanjem naoružanja i evidencije.

##### Član 2.

###### *(Izuzeci u primjeni)*

- (1) Odredbe ovog zakona ne odnose se na kretanje naoružanja unutar Oružanih snaga Bosne i Hercegovine i policijskih organa u Bosni i Hercegovini.
- (2) Odredbe ovog zakona ne odnose se na fizička lica kojima su izdate isprave o oružju.

##### Član 3.

###### *(Definicije)*

Pojedini izrazi upotrijebljeni u ovom zakonu imaju sljedeće značenje:

- a) *Naoružanje* je oružje, municija i dijelovi oružja i municije sa Liste naoružanja i vojne opreme iz člana 4. stav (2) ovog zakona.
- b) *Vojnu opremu* čine instrumenti, uređaji i sredstva sa Liste naoružanja i vojne opreme iz člana 4. stav (2) ovog zakona.
- c) *Kretanje naoružanja* je bilo koja vrsta prijevoza naoružanja.
- d) *Policijski organi* su agencije Ministarstva sigurnosti Bosne i Hercegovine (u daljem tekstu Ministarstvo sigurnosti), entitetska i kantonalna ministarstva unutrašnjih poslova i Policija Brčko Distrikta Bosne i Hercegovine (u daljem tekstu Policija Brčko Distrikta).
- e) *Isprave o oružju* su odobrenja za držanje i odobrenja za držanje i nošenje oružja koje izdaje nadležni organ unutrašnjih poslova.

#### II – Kretanje naoružanja

##### Član 4.

###### *(Uslov za kretanje naoružanja)*

- (1) Kretanje naoružanja obavlja se na osnovu odobrenja pribavljenog od nadležnog organa.
- (2) Ministarstvo sigurnosti donosi Listu naoružanja i vojne opreme za čije kretanje je potrebno odobrenje.

##### Član 5.

###### *(Zahtjev za izdavanje odobrenja za kretanje naoružanja)*

- (1) Zahtjev za izdavanje odobrenja za kretanje naoružanja iz člana 4. ovog zakona podnosi se organu nadležnom za izdavanje odobrenja za kretanje naoružanja i to:

- a) U slučaju kretanja naoružanja između entiteta ili između entiteta i Brčko Distrikta, odnosno kretanja naoružanja u vezi sa prelaskom državne granice Bosne i Hercegovine (uvoz, izvoz ili tranzit) Ministarstvu sigurnosti,
  - b) Entitetskom ministarstvu unutrašnjih poslova, odnosno Policiji Brčko Distrikta, u slučaju kretanja naoružanja unutar entiteta ili Brčko Distrikta.
- (2) Zahtjev se podnosi najkasnije dvadeset i jedan dan prije planiranog kretanja naoružanja.

**Član 6.**  
**(Sadržaj zahtjeva)**

- (1) Zahtjev za izdavanje odobrenja za kretanje naoružanja podnosi se na propisanom obrascu, koji je sastavni dio ovog zakona, a sadrži sljedeće podatke:
- a) Naziv podnosioca zahtjeva, kontakt osoba i broj telefona;
  - b) Naziv i adresa pošiljaoca, kontakt osoba i broj telefona;
  - c) Naziv i adresa primaoca, kontakt osoba i broj telefona;
  - d) Specifikacija naoružanja (proizvođač naoružanja, količina, način pakovanja i serijski broj);
  - e) Način prijevoza (drumski, željeznički, zračni, vodeni);
  - f) Podaci o prevoznom sredstvu;
  - g) Podaci o vozaču (ime i prezime vozača, JMGB i broj lične karte ili putne isprave, u slučaju prijevoza u drumskom saobraćaju);
  - h) Polazna tačka, planirani datum i vrijeme polaska;
  - i) Granični prijelaz (ako se radi o uvozu/izvozu/tranzitu naoružanja);
  - j) Konačno odredište i planirano vrijeme dolaska na odredište;
  - k) Pravac kretanja od polazne tačke do konačnog odredišta;
  - l) Porijeklo naoružanja
- (2) U prilogu zahtjeva iz stava (1) ovog člana potrebno je dostaviti:
- a) Dozvolu Ministarstva vanjske trgovine i ekonomskih odnosa Bosne i Hercegovine u slučaju uvoza, izvoza ili tranzita,
  - b) Odobrenje za nabavku naoružanja,
  - c) Dokaz o krajnjem korisniku naoružanja.
- (3) Dokaz iz stava (2) tačka c) ovog člana je ugovor o isporuci ili narudžbenica u slučaju kretanja naoružanja za potrebe organa iz člana 2. ovog zakona, odnosno izjava vlasnika naoružanja u slučaju kretanja naoružanja radi premještanja sa jedne lokacije na drugu.

### **III – Postupanje po zahtjevu**

**Član 7.**  
**(Provjera zahtjeva)**

Organ iz člana 5. ovog zakona, nadležan za izdavanje odobrenja za kretanje naoružanja, provjerava tačnost podataka navedenih u zahtjevu za odobrenje kretanja naoružanja i vrši provjeru drugih sigurnosnih elemenata u skladu sa važećim propisima.

**Član 8**  
**(Saglasnost)**

- (1) U slučaju odlučivanja po zahtjevu za odobrenje kretanja naoružanja iz člana 5. stav (1) tačka a) ovog zakona Ministarstvo sigurnosti će, u roku od sedam dana od dana zaprimljenog zahtjeva za odobrenje kretanja naoružanja, zatražiti saglasnost entitetskih ministarstava unutrašnjih poslova, odnosno Policije Brčko Distrikta, preko čijih se područja planira izvršiti kretanje naoružanja.
- (2) U slučaju odlučivanja po zahtjevu za odobrenje kretanja naoružanja iz člana 5. stav (1) tačka b) ovog zakona entitetska ministarstva unutrašnjih poslova, odnosno Policija Brčko Distrikta, će u roku od sedam dana od dana zaprimljenog zahtjeva za odobrenje kretanja naoružanja, zatražiti saglasnost Ministarstva sigurnosti.

- (3) Saglasnost, odnosno negativan odgovor na zahtjev za davanje saglasnosti iz stava (1) i (2) ovog člana ima se dostaviti u roku od sedam dana od dana zaprimljenog zahtjeva za davanje saglasnosti.
- (4) Uz zahtjev za dostavljanje saglasnosti za kretanje naoružanja iz stava (1) i (2) ovog člana prilaže se kopija dokumentacije iz člana 6. ovog zakona.

### **Član 9.**

#### ***(Odobrenje)***

- (1) Odobrenje za kretanje naoružanja sadrži sljedeće podatke:
  - a) Naziv podnosioca zahtjeva kojem se izdaje odobrenje,
  - b) Planirani datum kretanja,
  - c) Specifikacija naoružanja,
  - d) Prevozno sredstvo,
  - a) Tip vozila, broj registarske oznake, broj važeće saobraćajne dozvole, ime i prezime vozača, JMGB i broj lične karte ili putne isprave (u slučaju prevoza u drumskom saobraćaju),
  - e) Polazna točka, odnosno granični prelaz u slučaju izvoza/uvoza/tranzita),
  - f) Smjer kretanja od polazne tačke do konačnog odredišta.
- (2) Odobrenje za kretanje naoružanja izdaje se u formi rješenja.
- (3) Organ nadležan za izdavanje odobrenja za kretanje naoružanja može, prema potrebi, naložiti i poduzimanje posebnih mjera sigurnosti prilikom kretanja naoružanja (smjer i vrijeme kretanja, policijska pratnja i dr.).
- (4) Troškove potrebnih mjera sigurnosti iz stava (3) ovog člana snosi prevoznik.
- (5) Na kretanje naoružanja koje sadrži eksplozivne materije shodno se primjenjuju propisi o prijevozu eksplozivnih materija.
- (6) Odobrenje za kretanje naoružanja izdaje se sa rokom važenja do 90 dana od dana izdavanja.
- (7) Posebne mjere sigurnosti iz stava (3) ovog člana propisuje Ministarstvo sigurnosti.

### **Član 10.**

#### ***(Zabrana kretanja)***

Ministarstvo sigurnosti, samostalno ili na prijedlog entitetskih ministarstava unutrašnjih poslova odnosno Policije Brčko Distrikta, može zabraniti kretanje naoružanja u određeno vrijeme na cjelokupnom ili određenom području Bosne i Hercegovine.

### **Član 11.**

#### ***(Odbijanje zahtjeva)***

Ukoliko se u provedenom postupku utvrdi da nisu ispunjeni zakonski i sigurnosni uslovi, organi nadležni za izdavanje odobrenja za kretanje naoružanja odbit će zahtjev.

### **Član 12.**

#### ***(Dostavljanje rješenja)***

Rješenje po podnesenom zahtjevu za izdavanje odobrenja za kretanje naoružanja, dostavlja se podnosiocu zahtjeva i nadležnim organima, od kojih je tražena saglasnost, najkasnije u roku od dvadeset i jedan dan od dana zaprimljenog zahtjeva.

### **Član 13.**

#### ***(Žalba)***

Protiv rješenja iz člana 9. ovog zakona ne može se izjaviti žalba, ali se može pokrenuti upravni spor.

### **Član 14.**

#### ***(Najava kretanja)***

Pravno ili fizičko lice kojem je izdano odobrenje za kretanje naoružanja, dužan je organu koji izdao odobrenje najaviti vrijeme kretanja naoružanja najkasnije dva radna dana prije početka kretanja.

#### **IV – Nadzor i kontrola**

##### **Član 15.**

##### ***(Nadzor nad provođenjem zakona)***

- (1) Nadzor nad provođenjem ovog zakona obavlja Ministarstvo sigurnosti.
- (2) U postupku vršenja nadzora Ministarstvo sigurnosti može ovlastiti nadležna ministarstva unutrašnjih poslova i Policiju Brčko Distrikta da obavljaju nadzor i kontrolu nad kretanjem naoružanja.
- (3) Ministarstvo sigurnosti propisuje način i djelokrug provedbe nadzora i kontrole kretanja naoružanja.

##### **Član 16.**

##### ***(Zapisnik o nadzoru i kontroli)***

- (1) O provedenom nadzoru i kontroli nad kretanjem naoružanja sačinjava se zapisnik koji sadrži:
  - a) Tačan naziv subjekta nad kojim se vrši nadzor i kontrola;
  - b) Vrijeme i mjesto vršenja nadzora i kontrole;
  - c) Utvrđeno stanje;
  - d) Naložene mjere.
- (2) Sastavni dio zapisnika o nadzoru iz stava (1) ovog člana je zapisnik o izvršenoj kontroli.
- (3) Ministar sigurnosti propisuje jedinstveni obrazac zapisnika o načinu provedbe nadzora i kontrole.
- (4) Zapisnik iz stava (1) ovog člana dostavlja se Ministarstvu sigurnosti u roku od 7 dana od dana izvršenja kontrole i nadzora.

##### **Član 17.**

##### ***(Saradnja)***

Ovlašteni subjekti koji učestvuju u procesu kretanja naoružanja obavezni su tokom kontrole izvršavati naređenja ovlaštenih službenih lica koja obavljaju kontrolu.

#### **V - Evidencije**

##### **Član 18.**

##### ***(Vrste i način vođenja evidencija)***

- (1) Organi nadležni za izdavanje odobrenja za kretanje naoružanja vode evidenciju:
  - a) podnesenih zahtjeva za kretanje naoružanja;
  - b) izdatih odobrenja za kretanje naoružanja;
  - c) odbijenih zahtjeva za kretanje naoružanja;
  - d) provedenih nadzora i kontrola;
- (2) Oblik, sadržaj i način vođenja evidencija iz stava (1) ovog člana propisuje Ministar sigurnosti.
- (3) Centralni registar evidencija iz stava (1) ovog člana je u Ministarstvu sigurnosti.
- (4) Entitetska ministarstva unutrašnjih poslova, odnosno Policija Brčko Distrikta imaju pristup centralnom registru iz stava (3) ovog člana.

#### **VI – Kaznene odredbe**

##### **Član 19.**

- (1) Novčanom kaznom u iznosu od 1.000,00 KM do 10.000,00 KM kaznit će se pravno lice, a novčanom kaznom od 500,00 KM do 3.000,00 KM odgovorno lice u pravnom licu, koje u zahtjevu za izdavanje odobrenja za kretanje naoružanja navede netačne podatke (član 6.).

- (2) Novčanom kaznom u iznosu od 5.000,00 KM do 20.000,00 KM kaznit će se pravno lice, a novčanom kaznom od 1.000,00 KM do 5.000,00 KM odgovorno lice u pravnom licu kaznom, ako:
- Organizuje kretanje naoružanja bez prethodno pribavljenog odobrenja (član 9.),
  - Organizuje kretanje naoružanja suprotno izdatom odobrenju u pogledu vrste i količine (član 9.).
- (3) Novčanom kaznom u iznosu od 1.000,00 KM do 10.000,00 KM kaznit će se za prekršaj pravno lice, a novčanom kaznom od 500,00 KM do 3.000,00 KM odgovorno lice u pravnom licu, ako:
- Organizuje kretanje naoružanja suprotno izdatom odobrenju u pogledu pravca kretanja, odnosno odobrenog graničnog prijelaza (član 9.),
  - Organizuje kretanje naoružanja suprotno izdatom odobrenju u pogledu vozila i vozača (član 9.)
- (4) Novčanom kaznom u iznosu od 500,00 KM do 5.000,00 KM kaznit će se fizičko lice koje:
- Obavlja kretanje naoružanja bez prethodno pribavljenog odobrenja (član 9.)
  - Obavlja kretanje naoružanja suprotno izdatom odobrenju u pogledu na vrste i količine naoružanja (član 9.)
- (5) Novčanom kaznom u iznosu od 500,00 KM do 3.000,00 KM kaznit će se fizičko lice koje:
- Obavlja kretanje naoružanja suprotno izdatom odobrenju u pogledu pravca kretanja (član 9.)
  - Obavlja kretanje naoružanja suprotno izdatom odobrenju u pogledu vozača ili vozila (član 9.)

## **VII – Prelazne i završne odredbe**

### **Član 20.**

#### ***(Provedbeni propisi)***

- (1) U roku od 60 dana od dana stupanja na snagu ovog zakona Ministarstvo sigurnosti će donijeti Listu naoružanja iz člana 4. stav (2) ovog zakona.
- (2) U roku od 90 dana od dana stupanja na snagu ovog zakona Ministarstvo sigurnosti će donijeti provedbene propise o:
- načinu i postupku obrade zahtjeva za izdavanje odobrenja za kretanje naoružanja kao i obimu provjere zahtjeva (član 7),
  - načinu i postupku provedbe nadzora i kontrole (član 15),
  - obliku i sadržaju jedinstvenog obrasca zapisnika o provedbi nadzora i kontrole (član 16),
  - obliku, sadržaju i načinu vođenja evidencija, te rokovima čuvanja podataka u evidencijama koje vode nadležni organi (član 18).

### **Član 21.**

#### ***(Stupanje na snagu)***

- (1) Ovaj zakon stupa na snagu osmog dana od dana objavljivanja u «Službenom glasniku Bosne i Hercegovine», a primjenjivat će se po isteku devedesetog dana od dana objavljivanja.
- (2) Entiteti i Brčko Distrikt će uskladiti svoje propise sa ovim zakonom najkasnije do početka njegove primjene.

PS BiH, broj:  
dana,

Predsjedavajući  
Predstavničkog doma

Predsjedavajući  
Doma naroda

## PRILOG 1 - OBRAZAC ZAHTJEVA

Podnosilac zahtjeva  
/naziv pravnog ili fizičkog lica,  
sjedište i adresa,  
broj i datum/

Nadležni organ kojem se podnosi zahtjev  
/sjedište i adresa/

### ZAHTJEV za izdavanje odobrenja za kretanje naoružanja

1.	Naziv podnosioca zahtjeva: Kontakt osoba i br. telefona:					
2.	Naziv i adresa pošiljaoca: Kontakt osoba i br. telefona:					
3.	Naziv i adresa primaoca: Kontakt osoba i br. telefona:					
4.	Specifikacija naoružanja	naziv	proizvođač	količina	serijski broj	Način pakovanja
		1. 2. ... itd.				
5.	Način prijevoza: (drumski, željeznički, vazdušni, vodeni)					
6.	Podaci o prevoznom sredstvu					
7.	Ima i prezime vozača: JMBG: Br. lične karte ili putne isprave: (u slučaju prijevoza u drumskom saobraćaju)					
8.	Polazna tačka: Planirani datum i vrijeme početka prijevoza:					
9.	Granični prijelaz / prijelazi: (u slučaju uvoza, izvoza ili tranzita)					
10.	Konačno odredište: Planirano vrijeme dolaska:					
11.	Pravac kretanja:					
12.	Porijeklo naoružanja:					

Uz zahtjev se prilaže (prilozi moraju biti u originalu ili ovjerene kopije):

- Dozvola Ministarstva vanjske trgovine i ekonomskih odnosa (u slučaju uvoza, izvoza ili tranzita),
- Odobrenje za nabavku naoružanja,
- Ugovor o isporuci ili narudžbenica ( u slučaju kretanja naoružanja za potrebe OS BiH ili policijskih organa u BiH),
- Izjava vlasnika (u slučaju kretanja u svrhu premještanja sa jedne lokacije na drugu),
- Dokaz o uplati administrativne takse

MP

.....  
ime, prezime i potpis ovlaštenog lica

## OBRAZLOŽENJE

### Zakona o kontroli kretanja oružja i vojne opreme

#### I. Pravni osnov za donošenje zakona

Ustavni osnov za donošenje ovog Zakona sadržan je u članu III stav 1. tačka i) prema kojem je regulisanje međuentitetskog transporta u nadležnosti institucija Bosne i Hercegovine i članu IV. stav 4. tačka a) i e) Ustava Bosne i Hercegovine, prema kojem je Parlamentarna skupština Bosne i Hercegovine nadležna za donošenje zakona koji su potrebni za provođenje odluka Predsjedništva Bosne i Hercegovine ili za vršenje funkcija Skupštine po Ustavu, odnosno za ostala pitanja koja su potrebna da se provedu nadležnosti Skupštine.

#### II. Razlozi za donošenje ovog zakona

U cilju povećanja ukupne sigurnosti u Bosni i Hercegovini, ispunjavanja obaveza Bosne i Hercegovine proisteklih iz dokumenta *Upute stranama, Izmjena 24*, te potrebe za prenošenjem dosadašnjih nadležnosti vezano za nadzor nad kretanjem oružja i vojne opreme sa EUFOR-a na institucije Bosne i Hercegovine, odnosno Ministarstvo sigurnosti.

S tim u vezi Vijeće ministara BiH donijelo je *Odluku o formiranju međuagencijskih radnih grupa za izradu prijedloga propisa kojima se uređuje oblast proizvodnje, prevoza, čuvanja i skladištenja oružja i vojne opreme i prevoza opasnih materija i sredstava dvojne namjene* (Službeni glasnik BiH broj 60/07).

U skladu sa članom 6. Odluke, Radna grupa izradila je prijedlog Zakona o kontroli kretanja oružja i vojne opreme.

#### III. Načela na kojima se zasniva Zakon

Osnovna načela na kojima se zasniva Zakon su:

- načelo pravnog uređenja oblasti kretanja naoružanja u Bosni i Hercegovini.
- načelo usaglašenosti ove oblasti sa standardima koji se primjenjuju u zemljama Evropske Unije.

Također intencija Radne grupe je bila da postigne takva zakonska rješenja kojima će se izbjeći zadiranje u nadležnosti ministarstva unutrašnjih poslova entiteta, odnosno Policije Brčko Distrikta, a koja će omogućiti potpun nadzor nad kretanjem oružja i vojne opreme, što je bitan element ukupne sigurnosti u Bosni i Hercegovini.

#### IV. Konsultacije vođene u procesu izrade Zakona

U cilju realizacije postavljenog zadatka, u radu Radne grupe učestvovali su imenovani predstavnici različitih institucija iz Bosne i Hercegovine, ali i predstavnici međunarodnih organizacija u BiH, i to:

- Ministarstvo sigurnosti BiH,
- Ministarstvo odbrane BiH,
- Direkcija za Evropske integracije BiH,
- Ministarstvo vanjske trgovine i ekonomskih odnosa BiH,
- Ministarstvo vanjskih poslova BiH
- Granična policija BiH,
- Federalno ministarstvo unutrašnjih poslova,
- Policija Brčko Distrikta,
- EUPM,

- EUFOR,
- NATO,
- OSCE,
- UNDP,
- OHR

Predstavnici gore navedenih institucija su, kao neposredni članovi Radne grupe, učestvovali na izradi teksta Zakona, tako da Tekst predstavlja rezultat zajedničkog rada svih članova Radne grupe. U aktivnostima Radne grupe nisu učestvovali predstavnici Ministarstva unutrašnjih poslova RS-a, mada su imenovali svoje predstavnike.

Naime, aktom Ministarstva unutrašnjih poslova Republike Srpske broj K/B-1653/07 od 24.05.2007. godine dostavljenim Ministarstvu sigurnosti BiH, kao koordinatoru aktivnosti na izradi prijedloga propisa, obaviješteni smo da MUP RS-a *"neće učestvovati u izradi predloženih nacрта zakona i podzakonskih akata iz razloga što bi donošenje istih na nivou BiH predstavljalo prenos nadležnosti na institucije Bosne i Hercegovine, suprotno odredbama Ustava Bosne i Hercegovine i Zaključku Narodne skupštine Republike Srpske"*.

## **V. Potrebna finansijska sredstva**

Za provedbu ovog Zakona nije potrebno osigurati finansijska sredstva u Budžetu institucija Bosne i Hercegovine i međunarodnih obaveza Bosne i Hercegovine za 2008. godinu.

## **OBRAZLOŽENJE POJEDINIH ODREDBI ZAKONA**

### **Poglavlje I – Opće odredbe**

U ovom poglavlju se definišu oblasti koje se uređuju Zakonom, kao i izuzeci u primjeni.

#### **Član 1. i 2.**

Prijedlogom je predviđeno da se odredbe Zakona ne odnose na kretanje naoružanja koje obavljaju Oružane snage Bosne i Hercegovine i policijski organi u Bosni i Hercegovini u okviru obavljanja svoje službe. Izuzeci se, dakle, ne odnose na kretanje naoružanja u slučaju nabavke, odnosno isporuke naoružanja Oružanim snagama BiH i policijskim organima u Bosni i Hercegovini, od strane prodavca.

Također, odredbe Zakona ne odnose se na nošenje oružja i municije za koje je u skladu sa Zakonom o oružju izdata odgovarajuća isprava o oružju (nošenje ličnog oružja, nošenje oružja u svrhu lova ili u svrhu bavljenja sportskim streljaštvom)

#### **Član 3.**

Ovim članom su definisani određeni pojmovi koji se koriste u tekstu Zakona.

### **Poglavlje II – Kretanje naoružanja**

#### **Član 4. do 6.**

Zakonom se propisuje obaveza Ministarstva sigurnosti BiH da donese Listu naoružanja za čije kretanje je potrebno odobrenje, te se određuju nadležni organi za izdavanje odobrenja za kretanje naoružanja, rokovi za podnošenje zahtjeva, te obrazac i sadržaj zahtjeva za izdavanje odobrenja za kretanje naoružanja.

### **Poglavlje III – Postupanje po zahtjevu**

#### **Član 7. do 14.**



Ovo poglavlje propisuje postupanje nadležnih organa po zahtjevu za izdavanje odobrenja za kretanje naoružanja, rokove za postupanje, sadržaj odobrenja te pravni lijek za slučaj žalbe. Ministarstvo sigurnosti BiH propisuje posebne mjere sigurnosti koje se poduzimaju prilikom kretanja naoružanja. Propisano je također da u slučaju prijevoza preko područja dva entiteta ili entiteta i Brčko Distrikta, odnosno u slučaju kretanja naoružanja u vezi sa prelaskom državne granice (uvoz/izvoz/tranzit), Ministarstvo sigurnosti BiH izdaje odobrenje za kretanje naoružanja, uz prethodno pribavljanje saglasnosti entitetskih ministarstava unutrašnjih poslova, odnosno Policije Brčko Distrikta preko čijih se područja upućuje naoružanje.

Izdavanje odobrenja za kretanje naoružanja unutar jednog entiteta ili unutar Brčko Distrikta u nadležnosti je entiteta, odnosno Brčko Distrikta.

Propisana je i mogućnost da Ministarstvo sigurnosti BiH, po potrebi, odredi zabranu kretanja naoružanja u određeno vrijeme i na određenom području ili ukupnom prostoru Bosne i Hercegovine.

#### **Poglavlje IV – Nadzor i kontrola**

##### **Član 15. do 17.**

Ovim poglavljem propisuje se nadzor nad provođenjem Zakona, obaveza Ministarstva sigurnosti BiH da propiše djelokrug provedbe nadzora i kontrole, te obaveze službenih lica koja vrše kontrolu i nadzor. Takođe, propisana je obaveza subjekata koji učestvuju u kretanju naoružanja da izvršavaju naređenja ovlaštenih službenih lica.

#### **Poglavlje V – Evidencije**

##### **Član 18.**

Ovim poglavljem propisuje se obaveza vođenja odgovarajućih evidencija, a zadužuje Ministarstvo sigurnosti BiH da propiše oblik, sadržaj i način vođenja evidencija.

#### **Poglavlje VI – Kaznene odredbe**

##### **Član 19.**

Kaznenim odredbama propisuju se kazne za kršenje Zakona.

#### **Poglavlje VII – Prelazne i završne odredbe**

##### **Član 20. i 21.**

Prelaznim i završnim odredbama propisani su rokovi za donošenje provedbenih propisa, stupanje na snagu Zakona kao i početak njegove primjene.